



Pranuar / Dorezuar Priljeçat/Prudato Received/Delivery	07.06.2023	3	viti god year
Organ /Njesia Organ /Jedimica Org./Unit	Nr Prot Br. Prot Prot No	Shtojca Prillog Appendix	Sasia Kolicina Quantity
SHKURTIC	4624/2023		114



## Republika e Kosovës Republika Kosova-Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS  
NEZAVISNI NADZORNI ODBOR CIVILNE SLUŽBE KOSOVA  
INDEPENDENT OVERSIGHT BOARD FOR THE CIVIL SERVICE OF KOSOVA

A.nr.663/2023

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Malsore Gashi-Bajraktari- kryetare, Arben Mehmeti dhe Ardita Haxhnikaj-Demi -anëtarë, me Ilire Mehmeti-Shaqiri-Zyrtare e Lartë për Bashkëpunim Profesional, në cilësinë e procesmbajtëses, ka shqyrtuar ankesën me numër A.nr.663/2023 të datës 24.04.2023 të parashtruar nga ankuesja

kundër organit të punësimit Shërbimit Korrektues i Kosovës, në çështjen juridike "kompensim material", duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës si dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 07.06.2023, njëzëri mori këtë:

### V E N D I M

- I. **Aprovohet si e bazuar** ankesa me numër A.nr.663/2023 e datës 24.04.2023, e parashtruar nga ankuesja
- II. **Obligohet** Zëvendësuesi i Drejtorit i Përgjithshëm i Shërbimit Korrektues të Kosovës që brenda afatit prej pesëmbëdhjetë (15) ditësh nga data e pranimit të vendimit, ankueses t'i bëjë kompensimin e një page jubilarë me rastin e dhjetë (10) vite përvojë pune të pandërprerë në Shërbimin Korrektues të Kosovës
- III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.



## Ar sy e t i m

Nëpunësja civile e punësuar në pozitën e punës „Zyrtare për Personel “ në Qendrën e Paraburgimit në Pejë në kuadër të Shërbimit Korrektues të Kosovës, më datë 24.04.2023 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, gjegjësisht me datë 04.05.2023 ka bërë plotësimin e ankesës së lartë cekur kundër përgjigjes me numër protokollit 474 të datës 19.04.2023 të Udhëheqësit të Njesisë së Burimeve Njerëzore në Shërbimin Korrektues të Kosovës, lidhur me refuzimin e kërkesës së ankueses për realizimin e të drejtës së një page jubilarë, me pretendimin ankimor se gjendja faktike e vërteton se të njëjtës i takon realizimi i të drejtës së një page jubilarë.

Këshilli i Pavarur Mbikëqyrës për Shërbimin Civil të Kosovës ( *tutje referuar vetëm Këshilli*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 04.05.2023 ka proceduar kërkesën për përgjigje në ankesë të organi i punësimit Shërbimi Korrektues i Kosovës, ndërsa kjo e fundit më datë 30.05.2023 ka përcjell shkresat lidhur me këtë çështje ankimore.

**Kolegji për Shqyrtimin dhe Vendosjen e Ankesave ka administruar këto prova:** Ankesën me numër protokollit 3746/2023 të datës 24.04.2023 të parashtruar nga ankuesja në Këshillin e Pavarur Mbikëqyrës për Shërbim Civil të Kosovës; Kërkesën për pagë jubilarë të datës 27.03.2023 të ankueses D.L drejtuar Menaxherit të Burimeve Njerëzore të SHKK; Përgjigje në ankesë me numër protokollit 474 të datës 19.04.2023 të Menaxherit të Burimeve Njerëzore të SHKK-së; Plotësim i ankesës me numër protokollit 4031 të datës 04.05.2023 të parashtruar nga ankuesja në Këshillin e Pavarur Mbikëqyrës për Shërbimin Civil të Kosovës; Njoftimin e datës 22.12.2020 të dërguar me e-maili nga R.H për D.L, A.B, L.K, S.M, B.D, L.G, G.K, F.H, F.M, H.M, A.A, H.H, A.M, A.R, E.B, A.H, E.B dhe A.B; Akt emërim i lëshuar nga Shërbimi Korrektues i Kosovës për D.L me datë 06.03.2013; Kërkesë për përgjigje në ankesë e datës 04.05.2023 nga KPMSHCK tek SHKK; Përgjigje në ankesë me numër protokollit 747/2023 e lëshuar nga SHKK për KPMSHCK; Përshkrimi i detyrave të punës për pozitën e punës Zyrtare për Personel në Qendrën e Paraburgimit në Pejë-SHKK; Lista e pagave të ankueses për muajin Mars, Prill dhe Maj;

Kolegji për Shqyrtimin dhe Vendosjen e Ankesave, pasi ka shqyrtuar të gjitha shkresat e lëndës të parashtruara nga palët, ka konstatuar se ankesa e ankueses është e bazuar, *sepse:*

Nga administrimi i provave të lëndës Kolegji ka gjetur së ankuesja është e punësuar në shërbimin korrektues të Kosovës, dhe e i njëjta sipas Aktit të Emërimit të datës 05.03.2013 ushtron pozitën e punës “Zyrtare e Personelit,, në Qendrën e Paraburgimit në Pejë.

Me tej nga shkresat e lëndës rezulton së ankuesja më datë 27.03.2023, kishte parashtruar kërkesë të organi i punësimit mbi bazën e kompensimit të pagës Jubilarë në vlerën e një bazë, me rastin e mbushjes së dhjetë (10) vjet përvoja pune të pandërprera. Njësia e Burimeve Njerëzore në Shërbimin Korrektues të Kosovës në përgjigje të datës 19,04,2021 ka njoftuar ankuesen se *citat; duke pasur parasysh që realizimi i të drejtës në page jubilarë ndërlidhet me përvojën e punës të bazuar në listat e pagave që në rastin tuaj nuk ka mundur të realizohet deri sa ka qenë në fuqi paragrafi 1 nën paragrafi 1.2 i nenit 29 të Ligjit Nr.08/131 për Shërbimin Korrektues pasi që në listat e pagave keni*



*19 vite përvojë pune edhe pse ju keni themeluar punën me datën 01.10.2002 dhe gjendja faktike e përvojës tuaj në punë është mbi 20 vite.*

Ankuesja, më datë 24.04.2023 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, gjegjësisht me datë 04.05.2023 ka bërë plotësimin e ankesës lidhur me refuzimin e kërkesës për realizimin e të drejtës në pagë jubilarë, me pretendimin ankimor se gjendja faktike e vërteton se ajo i plotëson kushtet apo saktësisht përvojën e punës për realizimin e kësaj të drejte.

Kolegji i Këshillit duke u bazuar në dispozita e Ligjit Nr.03/L-212 të Punës përkatësisht nenin 2 paragrafi 1 dhe 2 të ku përcaktohet se: *"1.Dispozitat e këtij ligji zbatohen për të punësuarit dhe punëdhënësit e sektorit privat dhe publik në Republikën e Kosovës", "2. Dispozitat e këtij ligji zbatohen edhe për të punësuarit dhe punëdhënësit, punësimi i të cilëve rregullohet me ligj të veçantë, nëse ligji i veçantë nuk parashikon zgjidhje për çështje të caktuara nga marrëdhënia e punës"*, si dhe nenin 87 ku përcaktohet se: *"Të gjitha kërkesat nga marrëdhënia e punës në para, parashkruhen brenda afatit prej tri (3) vitesh, nga dita e paraqitjes së kërkesës"*, konstaton se pretendimet ankimore të ankueses e cila kërkon që t'i bëhet kompensimi në rastin arritjes se njëzet (20) vite eksperiencë në këtë institucion respektivisht e njëjta kërkon realizimin e pagës jubilarë në duke shtuar më tej se ankesën e bazon në dispozitat e nenit 29 pika 1.2.1 të Ligjit Nr.08/L-131 për Shërbimin Korrektues të Kosovës.

Kolegji i Këshillit, në bazë të gjendjes së plotë faktike dhe rrethanave ka shqyrtuar pretendimin ankimor të ankueses lidhur me realizimin e të drejtës së pagës jubilarë, dhe si rrjedhojë ka konstatuar se ankueses në bazë të Ligjit Nr. 08/L-131 për Shërbimin Korrektues të Kosovës respektivisht Neni 29, Paragrafi 1, nën paragrafin 1.2 dhe nën paragrafin 1.2.1 ku theksohet se: *1. "Përveç të Drejtave që janë të përcaktuara me Ligjin për Zyrtarët Publikë dhe Ligjit të Punës, personeli i SHKK-së ka edhe këto të drejta dhe detyrime specifike, 1.2. e drejta e pagës jubilarë: 1.2.1. personeli i SHKK-së gëzon të drejtën e një page jubilarë për çdo dhjetë (10) vite përvojë pune të pandërprerë në vlerë të një page bazë"*, Andaj duke u bazuar në vërtetimin e datës 30.05.2023 të Burimeve Njerëzore në Shërbimin Korrektues të Kosovës ankueses i takon e drejta e realizimit për pagën jubilarë sepse e njëjta ka përmbushur vitet e përvojës punës gjithsejtë 20 (njëzet) vite me datë 01.10.2022, pra disa muaj para barazimit të viteve të përvojës së punës në Listën e Pagave të realizuar nga Ministria e Financave, si dhe para datës 05.02.2023 të hyrjes në fuqi të Ligjit Nr.08/L-196 për Pagat në Sektorin Publik, i cili Ligj shfuqizon këto nene të lartë cekura të Ligjit NR. 08/L-131 Për Shërbimin Korrektues të Kosovës .

Kolegji i Këshillit për Shqyrtimin dhe Vendosjen e Ankesave konstatimin për realizimin e të drejtës në pagë jubilarë të ankueses e mbështet edhe në analizimin e Ligjit të Pagave Nr. 03/L-147, Neni 22, paragrafi 2 dhe nën paragrafi 2.3 i cili thekson se: *"Nëpunësit civilë, kanë të drejtat në vijim: 2.3. shpërblimi i përvojës (jubile)"*, pasi faktikisht e njëjta me datë 01.10.2022 ka përmbushur 20 (njëzet) vite të përvojës së punës në Shërbimin Korrektues të Kosovës dhe rrjedhimisht para datës të 05.02.2023 të hyrjes në fuqi të Ligjit Nr.08/L-196 të Pagave për Pagat në Sektorin Publik si dhe Ligjit nr. 08/L-131 për Shërbimin Korrektues të Kosovës

Theksuar si me sipër, e duke u bazuar në nenin 18 paragrafi 1 nënparagrafi 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetarja e Kolegjit.

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

## KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.663/2023

Ilire Mehmeti-SHAQIRI

  
Procesmbajtëse

Malsore Gashi-BAJRAKTARI

  
Kryetare e Kolegjit



**Vendimi i dërgohet:**

- Ankueses
- Zëvendës Drejtorit të Përgjithshëm
- Udhëheqësit të Burimeve Njerëzore në Komunën e Shërbimit Korrektues të Kosovës; dhe
- Arkivit të KPMSHCK-së

